

EAE eta Bavariako hezkuntza sistemen arteko lankidetzak bultzatuko dute

Alemaniko lander hau aukeratu dute agintariek heziketa eredu gisa

Euskal Herriko hezkuntza sistema hobetzeko asmoz Inaxio Oliveri eta Javier Muniozguren Alemaniako Bavaria lander-ean izan ziren, bertako Hezkuntza ministroarekin. Bi herrien hezkuntza sistemen arteko elkarlana bultzatu nahi izan dute ekimen horren bidez.

INIGO BIAIN / GASTEIZ

Inaxio Oliveri Eusko Jaurlaritzako Hezkuntza, Unibertsitate eta Ikerkuntza sailburuak eta Javier Muniozguren Unibertsitate sailburuordeak Bavariako (Alemania) hezkuntza sistemaren arduradunekin izandako harremanen edukia azaldu zuten atzo. Oliveri eta Muniozguren Zehetmair Bavariako Hezkuntza ministroarekin elkarlanean izan dira. Harreman horien helburua Bavariako Hezkuntza sistema aztertzea da, Euskal Herrian ahal den neurrian aplikatu ahal izateko, eta Bavariako Unibertsitatearen eta euskaldunen arteko elkarlana gauzatzeko, bai ikerkuntza arloan bai ikasleen arloan.

Inaxio Oliverik adierazi zuenez, «Legebiltzarrean Euskal Herriko hezkuntza sistemaren berrikuntza onartu genuen, eus-



Oliverik Bavariako hezkuntza sistema hartu du eredutzat.

JONTXU

kal ikasleek Europara ateratzeko bidea izan zezaten». Eta aukeratuak hezkuntza sistema Bavariako izan zen, Alemania barruan —kontuan izan behar da Alemaniakoa dela Europako hezkuntza sistema garatuenetakoa— gorenakoa baita. Oliveriren ustez, «Bavariako sistema oso ona da, baina ez dugu ahaztu behar hemen baino askoz bitarteko gehiago dituztela han.

Saiatuko gara hango elementu batzuk hemen txertatzen». Harremanak, Bavariako sistema aztertzeaz gain, hango hezkuntza buruekin informazioa trukatzeko eta bi ministerio eta unibertsitateen artean akordioak lortzea zuen helburutzat, eta lortu ere lortu da, nahi zen bezala, erlazio zuzena eta sakona gauzatzea.

Inaxio Oliverik esan zuenez, «elkarlan harreman hau lau

puntutan gauzatu da: Lanbide Heziketan —ikasketak bai Bavarian eta bai hemen egin ahal izateko, eskolan zein lantegietan—, titulazio bikoitza izateko aukera, ikasleen trukean —hemengoak hara eta hangoak hona etortzeko aukera—, eta azkenik, Bavariako Unibertsitatearen eta Euskal Herriko Unibertsitatearen (EHU) artean egin ahal izango diren ikerketak».

Kereila aurkeztuko du Lezoko Udalak hiru epaileren aurka

A. Z. / DONOSTIA

Lezoko Udalak kereila kriminala aurkeztuko du hiru magistraturen kontra. Kereila kriminal horren bitartez magistratuak inhabilitatzeko eta desterratzeko eskatuko du, Mikel Arrizabalaga Lezoko alkateak atzo prentsaurrekoan iragarri zuenez. Aspalditik datorren gatazkaren azken kapitulua da honakoa. Izan ere, udaleko langile baten eta udalaren artean irekitako lan prozedura bat tarteko piztu zen afera. Langileak demanda jarri zuen, baina demanda hori gaztelera hutsez jarri zuen.

Ordurako, ordea, Lezoko Udalak onartuak zituen (1987an, hain zuzen ere) euskararen gaineko ordenantzak, eta ordenantza hauen zortzigarren puntuan zera esaten zen, besteak beste: gaztelera hutsez idatzitako idazkiak atzera botako zirela, idazkiak gutxienez elebidunak izan behar zirelako. Hau aplikatuz, garai horretan alkate zen Aitor Sarasolak atzera bota zuen demanda.

Prozedurak bere bidea jarraitu zuen, eta Donostiako Auzitegian

epaia atera zen. Alde bat konforme geratu ez eta EAEko Auzitegi Nagusian errekurritu zuen. Hango epaia ere gaztelania hutsez igoen zioten Lezoko Udalarik. Udalak epai hau berriz atzera bidali zuen, lehengo zio beragatik.

Horren ostean Auzitegi Nagusiko Sozial arloko magistratuak autoa atera zuen non Lezoko Udalaren idazkia ez onartzeaz gain epaia buletin ofizialean argitaratzea eta ministerio fiskalari horren berri ematea agintzen zuen, honek Aitor Sarasolaren jokabidean erantzukizun kriminalik egon zitekeen ikus zezan, Sarasolak Justiziarekin kolaboratzeari uko egiten ziola argudiatuta.

Bost eguneko epea eman zuten erreguzko helegitea jartzeko, eta Lezoko Udalak jarri du helegite hori; Inigo Santxo Udalaren abokatuak adierazi digunez, EAEko egungo legedian oinarritu dira. Alabaina, Santxoren arabera, jarrera defentsibotik erasora pasatzea ere erabaki dute, hiru kereila kriminalak aurkeztuz era horretan Justizia Administrazioaren jokabide okerra salatzen.

Koldo Mitxelenari buruz Elixabete Perez Gazteluk egin tesia kalean

N. ARANA / ORERETA

Elixabete Perez Gaztelu oreretarrak, Patxi Altuna euskaltzain oso eta EUT-Gko irakaslearen zuzendaritzapean, Koldo Mitxelenaren lanari buruz egindako tesia aurkeztu zuen atzo, Madalen bezperan, Oreretako Udaltxeko areto nagusian bildu zen jendetzaren aurrean. Euskal Filologian lizentziatua eta iaztik doktore dugun Elixabeteren tesiak liburu itxura hartu du Udalak bultzatuta eta aurki kaleratuko dute. «Letra eta paper zaleontzat azter-saioak, burutazioak, gogoetak eta ilunbetik atera eta liburu itxuran kale argi eta gorrian jartzea, poz iturria ere badelakoan edo gutxienez izan daitekeelakoan nagoelako, Madalen bezpera hau beste edozein egun bezain egokia dela uste dut». Hitz hauekin ekin zion Elixabete Perez oreretarrak bere azalpenari.

Elixabeteren begien arabera Koldo Mitxelenaren egitasmoa eta egitate dugu beraz, egileak esan zuenez, idazle eta euskaltzale «agorgaitza-ren» lanaren ikerketa, egun, alde edo moldez, liburuan ispatatua. «Bere euskara noiznahiko egiteko gogobidea, gogobide horren gainazpiak, azalbarrenak, aitzin-gibelak eta bere noranahiko euskara duin, egoki eta erdugarrian gatzatuaren isla. Zer ikasteko dugun Mitxelenagan edo zer irakatsi didan Mitxelenak, alegia, makina bat ordu elkarrekin eman ondoren, zertan, non ikusten dudun gizon handi honen ekarria».

Patxi Altuna tesiaren zuzendaria harro agertu zen bere ikaslearen lanaren aurkezpenean. Zenbait arrazoik bultzatu zuten euskaltzain oso hau lan honetan sartzera: «Ikaslea nolakoa zen banekielako, nire laguntza handirik behar harko ez zuela banekielako, bere kabuz tesia egiteko gai zela banekielako eta nire bizkar gainean zama handirik ipintzen ez nuela banekielako». Beste arrazoi bat, Elixabetek aurkezturiko gaia izan zen: «Koldo Mitxelenaz egin nahi zuen eta nik oso maitea izan nuen bere garaian, bere obra ezagutzen nuen eta iruditut zitzaidan zer-bait lagun niezaiokeela».



Inigo Santxo abokatua.

EDURNE KOCH

EUSKO JAURLARITZA

HEZKUNTZA, UNIBERTSITATE
ETA IKERKETA SAILA



GOBIERNO VASCO

DEPARTAMENTO DE EDUCACION,
UNIVERSIDADES E INVESTIGACION

GIPUZKOAKO HEZKUNTZA LURRALDE ORDEZKARITZA

Abuztuaren 30eko 11etan Lasala 4 enparantzako Informazio Bulegoan, irailaren 1ean Ikastetxera joan behar duten Maisu-Maistren Kidegokoen ordezkapen izan-gaien deialdia egingo da. Esleipena abuztuaren 31n goizeko 9etan egingo da Usandizaga B.I. an (Pio XII enparantzan, z/g).